

Jems

1 ¹Ŋai Jems, Anut iŋanen urat tamol, agod Tubun en Jesus Kristus san dam mi a. Ilo uyan Anut san gugoi 12 tan gidigidad lo dumado den sad na girek en ŋigane yau da.

Kubianek id dabai ipanad da

²O teig muroug, muruan naon dugo dugo yak asini dop ilom uyan oŋ a. ³Man dugo, aŋ aloŋ ak saen aŋsam ilo rumok kubianek lo digane dan san nuŋon ilom lo igane ilasa dop lo atur sakar pe muruan asini san a. ⁴Dabai agane dop aŋsam kagin uyanan an, nuŋon uyan uyan ak ilom lo igane ilasa wa, an lo aŋsam ilo rumok idaisuda geig a. Agop fun an lo aŋ itaot atur ak, Anut san kagin kisaek ta lo adu san tia geig a.

Tamol maŋau tia dop igudani wa

⁵Aŋ lulunam lo ta iŋ maŋau uyan ak lo katukan tap, Anut isumiani dop iŋ an ipani wa. Man dugo, Anut tamolpein fidian iŋ dugudani den lo melmel uyanan ak ipidinai da. Iŋ dam tamolpein dusumiani dan ta ipidai na da. ⁶Ak man iŋ buben fidian Anut mi ipani dop igudani wa, man dugo, tamol buben raru raru den iŋsan ilon nek ibol tim beig ifunip beig yau imul oŋ dak igo ya. ⁷Tamol naok ago man Tubun en mel ipani wak ago ilon ta isou na wa. ⁸Iŋ ilon gidigidad yau dak, iŋsan kagin fidian dam lo, dal kisaek ta iri na da.

Tamol yaŋad tia, tamol filiad da yak sad ru kagin

⁹Kris tamol ta iŋ yaŋan tia man ilon ka uyan a, man dugo, murnap Anut yabisap yaŋak tubun ak ipani wa. ¹⁰Kris tamol ta iŋ melmel wei mi aman da man dam ka ilon uyan a, man dugo, murnap iŋ nek ibol tamol yaŋan tia yak ilasa woŋ a. Anut iŋ tamol filian anda yak aben tan en lo malan te yak ibisei san ago igane wa, nek ibol garaŋ san ai bob an ilasad itapas yau kisaek oŋ dak ago mi a. ¹¹Id taloŋ ak, ad tubun idu dan ad luon sakar ak ilasa da. Saen an ai rouk fidian imagar yau dop sad bob ad itapas yau pe leil lo dam uyan tia ya. Nek ago mi tamol iŋ filian aman da yak iŋsan urat fidian igane yan yabi idup yen dop ibisei yau a.

Kubianek san fun

¹²Tamol iŋ itur sakar pe, ate suek lo muruan isini tap iŋ dam ka ilon uyan a. Iŋ ate suek an iriŋani pasik tap, Anut iŋ murnap naon madok pempem san ipani wa, madok an kumaen panu lo yen da. Anut wagam ibol la ya, tamol iŋ ilon ipani mok tap iŋ kumaen imadop milaen a, an itout san tia ya.

¹³Tamol ta ate suek lo idu dop igo ta ibol na wa, “Anut ateg isue da.” Man dugo, aupasek Anut lo ta ipalu na da, agod Anut dam iŋ tamol aupasek lo ta idirai na da. ¹⁴Tamol kisaek kisaek aupasek lo diau dudu dan san fun man, iŋsiganed ilo saiak an ilod iŋanep aupasek digane da. ¹⁵Agop iŋsan buben imasa yan yaup nuŋon aupasek ilasa da, aupasek an yaup tubun mi ilasa dop materŋ ile wa.

¹⁶Ago yak niŋen o, ŋai teig muroug, mel en ale dop niŋen o sem ta irawan na wa. ¹⁷Melmel fidian uyanan iŋ kagin fidian itaot ak da sad fudi man lak na dien da, Tamad iŋ an idirai idsad na dudu ya. Patui keit lo dided dumat da. Ak man id Tamad man ago tia ya, iŋ lilaman san, agog dam ta ibilso ibilila na da. Iŋ lo man tidom tia, pempem itaot ago mi imado da. ¹⁸Iŋsen ilon ibol go, iŋsan ru rumok an lo, id idiradsig iŋanen nanuk mok tilasa ya. Ago dugo Anut san melmel igane yan lulunad lo id imug tilasa ya. Nek ibol ai ta malan malan nuŋon ifu dak igo won a.

Ulon dop gane

¹⁹ŋai teig muroug, aŋ ru kagin en alon uyan. Aŋ fidian kududom agurep ru alon uyanan, ilo isou agane gup ru abol a, agod tiŋaem dam ta saian kisaek on na wa. ²⁰Fun dugo, tamol san tiŋae saiak an Anut san kagin uyan ta igane ilasa na da. ²¹Ago yak niŋen o aŋsam kagin saiak saiak fidian, aŋsam aupasek san naok naok fidian abiau dop sem ibian adup Anut san ru a bubem lo yen den ilom isoup ari wa, man dugo, ru an iŋ dabai anda, an lo murnap materŋ san saen lo ŋutum ka ibinawi wa.

²²Ru an kawan ta alon on na wa, alon dop nuŋon dam agane kisaek a. Aŋ kawan alon on tap, sem irawan da. ²³Tamol ru ilon on dop ta iri na tap, iŋsen naon tig lo ile igo won a. ²⁴Iŋsen mitilaen ile wo uyan gup yau a. Ago gug iŋsen naon dugo yan ilon iŋaon kisaek on a. ²⁵Ak man kubiaen Kristus awan lo ilasa yan itaotan geig, agod kubiaen en subanek lo ipasad tilasag kawan tumado da. Enti kubiaen an tig igo won lo naon ilep lo Kristus awan iri dop man, bar iŋane wa. Gug iŋ kubiaen an kawan ta iri na wa, tia, Kristus awan ilon gup iri uyanan o maeg igane wa. Iŋ Kristus awan ilon pe ilon iŋaon kisaek on san tia ya, tia, iŋ awan ilon gup ilon san nuŋon an itaot fo mi igane ilasa wa. Tamol naok an Anut san bar iŋane wa.

²⁶Tamol iŋ ilo isou lo iŋ Anut san tamol ibol dak pempem igudani dak man awan kagin ta ipani na dan iŋsan ilo rumok an kawan a, an lo iŋsen

irawi da. Agog iŋsan ubou leil an dam kawan a. ²⁷Ubou san kagin ikok agod uyanan da Bai Anut malan lo man igo ya: nanuk bigabeg, pein suos, kaginad tigane dop iŋsad muruan lo tibinawai a, agod tan en san kagin tile dop bubed ta igane saian na wa.

Id tamol yaŋan tia yan ta tabi idu na wa

2 ¹Ŋai teig muroug aŋ idsad Tubun ak Jesus Kristus, kumaen panu san gurman an ilom lo rumok, ago tap man tamolpein yaŋad anda yak mi kagin ta apidinai na wa, tia, tamol saiak saiak adi dam kagin apidinai a. ²Tamol ta damag uyan uyan ak idirip aŋsam ubou ab lo ipalu dop, tamol ta biouŋ saiak saiak ak idirip dam ipalu wa. ³Oŋ tamol biouŋ uyan uyan ak idiri an kagin pani wo uyan pe iŋ rupei, “Aben uyanan en ŋanep masi,” ago dop tamol neinta an rupei, “Ago ila utur, tia dop igo tan na ŋieg fun na masi.” ⁴Aŋ kagin ago agane tap, aŋ lulunam lo biatitek agane da. Aŋ gurman oŋ alasag aŋsiganem ilo saiak saiak lo abititai da.

⁵Aloŋ, ŋai teig muroug, Anut tamolpein yaŋad tan en lo tia yan yaŋad iŋane wa, agod iŋ ilo rumok lo idaisuda yan ipilianai la ya, an lo Anut dam san madok aben lo filian fidian ipidinai a. Man dugo, fidian enti iŋ niŋedi wo imat den, Anut promis ipidinai ak ago igane wa. ⁶Ak man aŋ tamol melmel ad tia yan abiai dudu da. Aŋ aloŋ ak tamol melmel wei mi ad da yan aŋ dibiaŋ adu dop muruan dupanaŋ da. Iŋsed mi diŋiliaŋ pe gurman naod na atur a. ⁷Iŋsed mi Kristus san yaŋan uyanan ipanaŋ go, lo digiaŋ se yan lo, ru saiak saiak dubol ilasa da.

⁸Anut san girek lo kubiaŋ malan te yen dan lo igo ibol, “Oŋse niŋe wo umat dak ago mi, tei murou siŋire na dam niŋedi wo umat a.” Oŋ an rumok uri tap, an nek uyanan mi a. ⁹Go aŋ aenta ael saiadi dop, aŋ au apas da, an lo kubiaŋ ibol ago aŋ kubiaŋ malan asue ya. ¹⁰Tamol ta kubiaŋ fidian iri uyan dugo kisaek ipitiŋini tap iŋ kubiaŋ fidian ipitiŋini mok a. ¹¹An san fun man igo woŋ. Anut ibol, “Tamol ta sen turan san iwon da aupasek ta digane na wa.” Agog iŋ fon ibol da, “Tamol ta fini imat na wa.” Oŋ kubiaŋ kisaek an uri dop, turan ta lo tamol funi imat tap, oŋ kubiaŋ fidian pitiŋini a. Man dugo, Anut iŋsen kubiaŋ an fidian ibol dilasa ya.

¹²Aŋ dugo aŋiŋeŋ dop kagin agane wak i? Aloŋ uyan, saen Anut id bitinaek lo idirad an, iŋ malan ipalug turad bubed tupidinai dop iliad o malan ipalu da. Nek fun an niŋen o, oŋsa madok lo kagin ganep mado tap, ilo panek san dal uri wa. ¹³Saen Anut bitinaek lo idirad dop, talpein a aenta ilon ta imuŋanai na yan, Anut talpein an ilon ta imuŋani na wa. Ilo muŋanek an tubun kasik, an niŋen o oŋ Anut ibio udu wo umoi tap, aenta ilo imuŋanai mok a.

Kagin naok naok en ilo rumok san nuŋon mok

¹⁴Ŋai teig muroug, tamol ta iŋ ibol, ŋai ilog lo rumok a. Ago ibol ak gug, iŋsan ilo rumok an iŋanen naok naok lo yan nuŋon tia ya. Ak

dugo, iŋsan ilo rumok nuŋon an tia yan ka ibinawi wak i? Man tia geig a. ¹⁵Isop tei murou boi, lu murou boi, iŋ tinid san biouŋ, tia, agod anan diani san dam tia tap man, ¹⁶oŋ melmel anan boi, biouŋ direk san boi, an iŋ lo tia yak ta pidina na, ago gug rupidaig ubol, “Awo, an ilom maror anda amado. Ilom isoup kulos wananan san ak adiri gup, anan tubun mok ani wa.” Kagin an ta uyan na, agod nuŋon an tia ya. ¹⁷Nek ago mi, ilo rumok kawan yen dop iŋanen naok naok lo nuŋon tia tap, ilo rumok an imat a.

¹⁸Ak man tamol ta iŋ igo ibol, “Oŋ ilo rumok ama da, gug ŋai kagin naok naok uyan ak amag da ya.”

Ŋaisag ru naon man igo, “Oŋsa ilo rumok a kagin naok naok an tia yan kubiai dop ŋile. Ago dop, ŋai kagin naok naok uyan ak ŋigane dan lo ŋaisag ilo rumok ŋukubiai dop ule wa.” ¹⁹Oŋ Anut kisaek mok an niŋen o ilo rumok di? Uyan a, ak man an ta idaisuda na ya. Nek ago mi ur saiak saiak dam ilo rumok lo Anut kisaek dubol go dirut direr da.

²⁰Oŋ burau tamol! Oŋ dag ŋai ŋukubiai dop ule o boi, ilo rumok naok an nuŋon tia kawan i? ²¹Wagam en dugo woŋ Anut iŋ malan lo id tubud baged Abraham iŋaneg itaot ilasa yak i? Abraham iŋsiganen kagin naok naok lo iŋanen nanun ifuni imat pe utut fo imarip Anut ilo uyan ipani wo ago igane ya. ²²Oŋ ule, iŋsan ilo rumok iŋ kagin naok naok da sisem urat digane kisaek da. Iŋsan kagin naok naok an lo iŋsan ilo rumok ilasa siŋaokan a. ²³Agog dal an lo ru a girek lo yen dan rumok ilasag ibol, “Abraham iŋ Anut mi ilon lo rumok a, agog iŋsan ilo rumok an Anut ileg ibol, iŋ tamol itaot a.” Ago yak niŋen o Anut ibol, “Abraham iŋ ŋaisag turag mok.” ²⁴Oŋ ule yak, an iŋsiganen kagin naok naok amaiak lo man iŋ Anut malan lo tamol itaot ilasa ya. An iŋsiganen ilo rumok lo mi tia ya.

²⁵Nek ago mi dal san pein Rahab iŋ dam Anut malan lo iŋsiganen kagin naok naok lo itaot ilasa ya. Iŋsen mi ru sinek san tamol ilo uyan ipidinaig idinaig dal senamo lo dusol go diau a. ²⁶Ago yak niŋen o tinid ur an tia man imat a, nek ago mi, ilo rumok urat an tia yan dam imat a.

Bale tirni wo uyan a

3 ¹Ŋai teig muroug an wei mi girek maŋau ta alasa na wa. An alon ak maŋ girek maŋau man aenta lulunad lo Anut san bitinaek dabai mok ak lo mumado wa. ²Id fidian aupasek funfun tigane da. Tamol ta iŋ niŋen lo aupasek ta igane na den, iŋ itaotan, agog iŋsen tinin fidian dam ka iturni wa.

³Saen id bafolo ŋudun lo kam nanun tiganep tirae tap, bafolo tinin fidian mi itilanip ŋied abad iri wa. ⁴Tia dop, wog tubun ak ilom isou. Gidad tim tubun ak ifurep wog an ididip yau a, agod wog an dam tubun mok, gug fei nanunan an nam unbek tamol mi, iŋ ka wog dugo yau o imat

dan igirip ago yau a. ⁵Baled dam nek ago mi, sen ka nanunan a, ak man in̄ dabai a, in̄ ka melmel tutubun ak igane ilasa wa. Yai balen nanunan ak ka imasap dagui tubun ak igane inani yau a. ⁶Id baled dam yai on̄ a, in̄ tinid san boi lulun̄ad lo kagin sisaik sad gurman imado da. Baled an kagin saik saik funfun igane ilasa da. In̄ iganep tinid ilon fidian nun ipani da. Ago iganep tinid san kagin yai wananan on̄ a, agop idsad turen̄ ilasa saian da. Agod Ades san yai amaiak baled lo yai igane ilasa da.

⁷Tamol in̄ ka melmel funfun itirnai a, agog wei mi kagin ipidinai la ya. Anakanak, bor kasik, gown kasik, kusen̄ funfun agog beig lo fon da mi a. ⁸Ak man tamol ta in̄sen balen itirni san tia ya. Balen yaes ta ibal na da, ru saik saik ibol yau won̄ da. In̄san balen dam ibol mot wagai ak on̄, agod in̄san dabai tubun mok an lo tamol ka iginiai dumat a.

⁹Id baled lo idsiganed Bai Tubud tabol dan yañan tabisa da, ago gug afon idsiganed teid taod tupudai saian da. Gug teid taod an Anut idirai dilasag ibol in̄sen ago mi won̄ a. ¹⁰Ru ilo uyan san in̄ ru saik saik da sisem awak kisaek lo mi dilasa da. In̄jai teig taog, kagin an ta mok ilasa na wa. ¹¹Ka you ibanaip dal kisaek lo mi, gigen in̄ bulbal da dilasa wak i? ¹²Nek ago mi papai ka añar lo ilasa wak i? Aria, ka woi lo fud ilasa wak i? Nek ago mi beig lo you mok tin̄ane san tia ya.

Mañau uyan Anut san na idu ya

¹³Enti an̄ lulun̄am lo in̄ kankan milaen anda, agod mañau uyan anda yak i? Tamol ago tap, in̄san madok uyan ak lo sen ikubiai dop tile wa. In̄san kankan milaen an nuñon tap, san nuñon man mos kagin. Ago tap, mos kagin an lo urat sensen igane dop tile wa. ¹⁴Ak man an̄ turak lo aenta eil saian dugo, in̄ai-in̄ai kagin lo yañam tubun ilasa wo agane da. Aria, kagin an bubem in̄anefute tap, se pitianoi ru ta abol na wa. Kabelan sem irawan̄ dop ru rumok san aben lo ru sewak agane banau. ¹⁵Kankan milaen naok ago yan sewak a. An kumaen panu lo ta idu na ya. Tia, kankan an tan en san, an Urgun san tia, an ur saik san mi a. ¹⁶Man dugo, aben a ate turak susai agod in̄ai-in̄ai kagin dien dan, ante dam aban̄ pitiñinek san kagin, agod kagin sisaik fidian dien da.

¹⁷Ak man kankan milaen a lak na yak idu yan man igo ya: in̄san ilo isou fidian man ikok, in̄ tamol maror igansi san, in̄ tamol mos an, in̄ ilon dabai an tia ya, ilo muñanek tinan, in̄san kagin nuñon uyan uyan ak mi, in̄ kagin kisaek ak mi iwae dak, agod ru rumok san a. ¹⁸Tamol a maror digansi dan, maror lo sad ai patun dupae yan, sad urat san nuñon man in̄ tamolpein didiraip Anut malan lo itaot dilasa wa.

Anut mi awan wabi wa

4 ¹Fun ata mel niñen o an̄ lulun̄am lo wagai agane dugo nug apei adiri di? Bube imasa san kagin an̄ kisaek kisaek ilom lo yen da,

agog an tinim ilon fidian lo wagai igane dugo mel ta niŋen o amat den dam anjane wo da. ²Anj melmel niŋedi wo malam isi dak ta anjane na da. Anj tamol afu dumat agod iŋsad melmel apasi asini wo ilom tubun mok imasa da, gug ta anjane na da. Ago agane dan fun dugo anj Anut ta asumiani na da. ³Agog saen anj asumiani dubo man ta ipanaj na wa, fun dugo anj asumiani saian da. Melmel anjsiganem bubem lo aganep siganem tinim mi lo urat apani wo da.

⁴Anj Anut abisei ak ibol dal dal pein iwon ibisei ak igo wonj a. Anj ta alonj na yak, anj tan en niŋen o amat tap, anj Anut san ager. Agog tamol enti tan en san turan imado wo tap, inj Anut patun ipanip Anut san ager igo wonj a. ⁵Girek an sen kawan ago abol banau, Anut san ru rumok girek lo igo ibol, “Anut inj tura susai kagin lo tamol sad ur ilod lo idiri an itargiranig imado da.” ⁶Ak man binawek Anut id ipanad an san dabai idsad aupasek san dabai irinani a. Ago yan lo girek an igo ibol, “Tamol sed yaŋad disini den Anut patun ipidinai a, gug tamol sed ibiai dudu den inj ilon ipidinai a.”

⁷Ago yak niŋen o Anut paen na au a. Ago dop Satan patum apani wa. Ago tap inj anj ibisawanj pe isol yau a. ⁸Anut siŋiren na au dop inj anj siŋirem na ipalu wa. Anj aupasek tinami, banim afulani. Anj bubem raru raru amami, bubem akubune pasik pe ikok yen a. ⁹Ilom idup tinaŋ aru agane wa. Anjsiganem silenj an abilisap tinaŋ onj a. Ilo uyan amoi dop ilo muruan agane ilasa wa. ¹⁰Anj Anut naon na sem ibianj adu wa, ago dop inj anj ibiansap lak na iginianj a.

Tei tao ta biai dudu na wa

¹¹Awo, ŋai teig muroug, nug patun fo anjinenj amoi. Tamol enti tein patun fo injinenj dop tein bitinaek lo igane tap, an ta igane uyan na da. Inj kubiaenj patun fo injinenj, agog inŋsen tamol gurman onj ilasag, kubiaenj bitinaek lo igane ya. Onj ago gane tap, onj kubiaenj paen na man tia ya. Kubiaenj an onj paen na yen o gane da. An lo onj tamol kubiaenj ta iri na dak igo wonj lasa ya. ¹²Tamol kisaek o lian kubiaenj ipanad dak ibitiniad a, Anut inŋsen mi a. Inŋsen mi dabai anda, an lo na kagin ipanad dak agod an dam lo malad isue wa. Ak man onsa ilo isou lo onj tubu ubol di? Onj urat ta lo onsa tura murou bitinaek lo ta dirai na wa.

Ŋinenj lo se yaŋa ta wabisa na wa

¹³Aria, ŋaisag ru alonj, anj tamolpein igo anjinenj den, “Gamui boi gabulo boi panu ta tubun geig ak lo taup ananar kisaek tumado wa. Ate tumado dop moni san urat biabi tigane dop sed niŋed o moni wei mi tinane wa.”

¹⁴Ata wo anj ago abol dak i? Anj gabulo san mel ilasa san an ta alonj na ya. Ansam madok dugudo, an man nek ibol kakao ilasap kitekan ka yen dop itout yau kisaek onj dak igo wonj a. ¹⁵Tia, anj igo mi abol a, “Anut inŋsen mi

siganen ilo isou lo, maŋ mumado dop en migane wo, tia, an migane wo, ago ibol dop migane wa” ¹⁶Ak man aŋ silei kagin lo sem mi abol da, agog yaŋam asini dugo tubun mi aŋiŋeŋ da. Aŋ ago aŋiŋeŋ dan saian geig a. ¹⁷Tamol enti mel uyan ak igane san ilon, go ta igane na tap, kagin naon ago man aupasek anda ya.

Filian tamol adi sad ru kagin

5 ¹Agog gamu aŋ tamolpein filiam amam da yan ŋaisag ru alon. Madai funfun tinim lo ilasa wan niŋen o ilom saian dop malam turon idu dop asasai a. ²Aŋsam filian fidian igan yau dop tinim san biouŋ simirer diani wa. ³Agop aŋsam pat fidian dam teirteir lo isuda wa. Teirteir an aŋ tamolpein fidian sam kagin saiak saiak ikubiai dop dile wa. Teirteir an aŋsam mudam mi yai inani woŋ a. Fun dugo, tan en san nal wadan lo aŋsam filiami an atumani da. ⁴Aŋ tamol a aŋsam abi urat digane dan arawaig tinid ta adad na ya. Agog sad padau dam ta alon na ya. Alon, saen dipadaug diwagin an asau mi geig yaug, Anut iŋ eŋel sad Gurman an kududon lo ilasa ya. ⁵Aŋsam madok tan en lo man melmel funfun amam da, aŋsam madok uyanan, agog aŋ melmel naod lak lak ak idaisuda, agod aŋ dugo agane wo man ka agane woŋ da. Aŋ materŋ san nal iŋ muruan san saen lo dam aŋsem ifutuwaŋ dugo sem tinim bulbal apani uyan da. ⁶Aŋ tamolpein uyadi ak bitinaek lo adirai dak muruan apidinai dop kadi dam afu dumat da, man dugo, iŋ dabai ad tia yan lo aŋsam dabai an diabiani san tia ya. Ago yak niŋen o muruan tubun ak aŋsam na ilasa wan niŋen o asasai dop atata wa.

Muruan lo atur sakar

⁷ŋai teig muroug, muruan lo atur sakar, ago mi yen yau dop Tubun en ipalu wa. Aŋ ale yak, tamol abi lo urat igane dak iŋsan abi ititianip imado yau dop anaŋ ibes idu da. Iŋ saen milaen mok tok ibol imado dop ui san saen ititiani da. ⁸Aŋ dam tok abol atur sakar a. Man dugo, Tubun en ipalu wo sumeik da. ⁹ŋai teig muroug, nug patun fo ta aŋurŋur na wa, kabelan Anut aŋ bitinaek lo idiraŋ banau. Ale, Bitinaek Tamol sumeikan dalawan ate itur da.

¹⁰ŋai teig muroug, Anut san profet ilom isou, iŋ Tubun en yaŋan lo diŋiŋeŋ da. Iŋ muruan iŋ madai dam disini bo man dile dugo disini woŋ se ya, ago yak niŋen o aŋ dam dal kisaek an ari wa. ¹¹Tamol a dutur sakar go muruan lo ta dibiakik na dan, id talon ak, iŋ ilo uyan san tamolpein a. Aŋ Job san madok itaot an alon a. Job saen iŋ madai ile dop muruan isini se man iŋ tok ibol imado se ya. Agod iŋsan wadan a Anut iŋ niŋen o igane ilasa yan dam alon a. Job Tubun en ilo panek agod ilo muŋanek dam tinin iŋanefute yan ile ya.

¹²Ak man, ŋai teig muroug, mel tubun geig man igo, aŋ Anut yaŋan lo boi, ta tan yaŋan lo boi, ta mel gidad gidad ta boi lo siŋanem ru dabai

ta apani na wa. Ansam awok man nek mel nuŋon niŋen o gup awok abol a, ago dop tia man nek tia mok abol a. Kabelan Anut aŋ ibitiananŋ dop muruan ipananŋ banau.

Ilo rumok san gudanek

¹³Aŋ ta lulunam lo muruan isini di? Ago tap iŋ Anut san na igudani wa. Dugo, aŋ ta lulunam lo ilon uyan di? Ago tap iŋ Anut yaŋan yabisa dop bar yabi wa. ¹⁴Tamol ta lulunam lo subam ifuni di? Ago tap midaen sad matu igiaip, dupalup, niŋen o dugudani dop Anut yaŋan lo gureŋ tinin diamisi wa. ¹⁵Fun an lo gudanek ilo rumok san, an tamol subam anda yan iganep uyan ilasa wa. Agod gubak mi aupasek igane yak tap, Anut tamol an san aupasek ipasi yau pasik dop ilon ipani wa. ¹⁶Ago yak niŋen o nug naon na siŋanem aupasek afulale dop nug niŋen o agudani wa, ago dop an lo Anut ikubunianŋ a. Tamol itaot aman ak san gudanek dabai tinan, agog dam ka urat dabai ak igane ilasa wa.

¹⁷Nek ibol Elaija oŋ, Elaija man nek idsed oŋ a. Iŋ Anut san na ui ta idu na wo igudani, agog nuŋon ilasa ya. Ui tan na ananar utol wadan da, ta isi na ya. ¹⁸An itout go fon igudani da, agog ui idu dag, tan na anan nuŋon idiri ilasa ya.

¹⁹⁻²⁰Iŋai teig muroug, tamol ta aŋ lulunam lo kagin rumok ak ibisei dop ansam ta inanep dal uyan ak lo imul ipalu tap, tamol uyan an tein san ŋutun mateŋ lo yak inane imul a. Aria, kagin en ilom isou wa, tamol enti turan dal saian ak lo itor den ibinawi tap, tamol an turan san ŋutun ta imat na san ago igane ya, agog san aupasek fidian dam imiamai pasik a.